

四庫全書

史部

欽定四庫全書

史部

山西通志卷一百四十三

詳校官給事中_臣王鍾健

檢討_臣德生覆勘

總校官進士_臣朱鈐

校對官中書_臣吳俊

謄錄監生_臣熬圖

欽定四庫全書

山西通志卷一百四十二

孝義二

潞安府

漢

鮑昂德子字叔雅有孝義節行初德被病數年昂俯伏左右衣不緩帶及處喪毀瘠三年抱負乃行服闋遂潛於墓次不闕時務舉孝廉辟公府連徵不至卒於

家

魏

祝公道素尚將初郭援攻河東邑長賈逵死守攻益急
父老乘城約不害守乃降比降援欲以為將逵叱賊
不屈援怒促斬之吏民伏其背且乘城大呼曰負約
殺我賢君寧俱死耳乃囚於壺關將害之逵竊嘆曰
此間無健兒耶而使義士死祝公道聞之夜半引出
折械遣去不語以姓名及援敗乃知後以他事坐死逵

抹之不能解為之改服

梁

韓懷明上黨人客居荊州年十歲母患屍注每發輒危
懷明夜於星下稽顙祈禱時寒甚切忽聞香氣空中
有人語曰童子毋須臾即差無自勞苦未曉而母豁
然平復鄉里以此異之年十五喪父幾至滅性負土
成墳贈助無所受免喪與鄉人郭麻俱師事南陽虬
虬嘗一日廢讀獨居泣涕懷明竊問其故虬家人答

云是外祖亡日時乳母亦亡故感動懷明聞之即日
辭還家就養家貧常竭力以供甘肥嬉怡膝下朝夕
不離母年九十一終懷明水漿不入口者一旬號泣
不絕聲有雙白鳩巢其廬上字乳馴狎若家禽焉服
釋乃去天監中刺史王愔表言之累辟不就卒於家

北魏

陽引襄垣人三歲喪父養於叔母年九十二終引已七
十五歲猶哀毀過禮恨不識父面追服斬衰粥食誓

終厥身凡十三年孺慕如一日鄉閭三百人上狀稱
孝有司奏聞魏主標其純孝加以散員

唐

陳正謙上黨人以信義著聞劉武周寇上黨高祖遣王
行敏馳救兵乏食正謙出粟千石濟之由是人人自
奮賊乃去

張光玘潞州人親疾刲股給帛

五代

韓德屯留人累世同居母死廬於墓側累年種瓜供祭
瓜有合歡帶之祥詔旌其門

宋

邢濬八世同居咸平中表其門蠲其租征

元

富珠哩克恭生二歲父母俱亡育於外氏比長追念親
劬常悲風木兄某旅喪歸其遺骸伯孀失養躬具甘
旨及終以禮葬人皆以孝義稱之

和孝中長子人性孝貧甚力穡供甘旨父歿廬墓三年
形槁廢櫛沐髮幾脫人多憐之至正間旌為孝子

楊興長子人至正十二年縣尹齊泰奏旌為高年耆德
之門

王恭長子人母薄氏寢疾躬奉湯藥迨卒哀毀廬墓側
適妻李氏歿子明亦哀毀廬墓會兵興焚掠父子相
對飲泣不去學士吳顥為記有碑

張甫襄垣人五世同居至元初旌表

申克讓黎城人父天祐卒哀毀廬墓負土成墳旌為孝子

張資平順人任黎城縣尹弟俊任千戶姪儀任副使同居三世官胥有聲

明

暴斌長子人質朴尚義宣德中徙民實塞下代兄往役時以為難

白聚良長治人性朴實不知書母歿廬墓六年又張仲

智亦以廬墓稱孝

按孝子傳白聚良作唐人

王俊長治人親歿廬墓日夕哭泣負土築墳弔者至惟稽顙不出一語三年盜賊虎狼無敢相犯里人欲舉其孝則曰人子自盡其心何辱旌為里人化之有張

攢張提車桐郭景榮俱廬墓云

按孝子傳作唐人

仇鴻長治人給事中敏之曾孫孝弟順義居喪不御酒肉三年後子孫最盛

仇時濟五世同居百有餘口歡然無間嘗與弟立家範

以為世守

仇朴敏之後與弟欄事繼母如生母母疾朝夕侍奉比卒廬墓三年旌曰二孝欄尤以讀書執禮聞於時

陳德海壺關人事嫠母閤撫幼弟某以孝友稱

李芝蘭長子人父母年俱八旬晨昏左右婉曲承歡時推孝子

李清屯留人性篤孝母歿廬墓狐兔為之馴擾事聞旌其門

王之翰平順人隱居不仕義方訓五子仁施鄉里

王進朝平順人五世同居事聞旌門又劉守全七世同居旌為義門

李庭玉潞州人正統中輸財助官賑濟旌義民

任昇秦仕胥長子人正統間輸賑千石旌表

張宏粟振金秉文張復旺趙興崔景春李贊董子榮李

鸞張鳳李城張恕李果鄭得興王思賢崔深靳良董

興楊慶劉岩胥長治人正統間俱以捐粟千石賜敕

獎諭勞以羊酒復其家三年

路俊郭麟王代昇楊慶王英牛聚良王仕亨閻節路環
胥壺關人正統間俱以輸賑千石旌表又李瑾成化
間以捐賑五百石旌表

韓瞻常鎡楊得苗張才成胥黎城人正統間俱以輸賑
千石旌表

王威吳伯雲郭復陳胥襄垣人正統間俱以輸賑千石
旌表

原富長治人傭工養父父年八十二疾篤思肉貧弗能
得割胸前一臠烹而進之父以為美詢所自來曰乞
諸鄰再食請再乞疾立愈而刃傷浹旬亦遂平楊廉
訪飭表其間並給庖廩云

路甸長治人與妻王氏竭力事親手製馬策鬻供父飲
父既卒母年愈高左右扶掖不少怠家計漸裕母好
周濟甸嘗先意成之自少至老未嘗出一忤語

李文志長治人母老寢疾夜思肉食甚急引刀剖胸肉

進之疾尋愈

趙應格襄垣人家貧鬻飯竭力事親委曲承順不少倦
杜印靳榮范有亨周公政郝曾王新石曇胥屯留人正
統間俱以輸賑千石旌表又范桓石連郝倫郝敏張
翱成化間捐賑八百石旌表

王子順長治廩生父年九十母年八十有四母歿時方
嚴冬飲水跣足凡七日哀毀慘戚茹素終喪當道欲
為申請力辭之由貢生官教授

韓錦潞城人世敦孝讓自高祖和至孫子昭六世同居
又同邑李昇自高祖德亨至姪珉等亦然俱於成化
六年旌為義門

馮爾玉屯留人有義行多助婚喪出粟賑饑成化十八
年給以七品散官

路聰屯留人強幹尚義成化中流寇充斥糾衆縛其渠
魁縣令某被誣罷去倡義治裝送之又嘗說橫璫使
自斂戢人以為難孫王道官光祿卿

仇森字時茂別號玉松子潞州人居東火村瀋瀋恭禧
王選為儀賓傳家孝友數世同居立祠堂飭家範初
祠堂成祭畢作誓詞云吾家子孫及諸婦敢有不孝
不弟不同心協力或積異財謀分析者祖宗達於神
明殛罰之鄰莊僧寄錢二十千僧暴死無弟子親屬
乃出錢以葬僧餘皆頒僧之鄰人正德間迎養祖母
陳於城中合家偕往已而流賊奄至得免賊退聞有
不從賊死者趙表焦王四婦白於巡撫王立碑建祠

初賊至索馬不應火其家卒弗與曰不與害一家與則害及四方矣有子熙游於庠使從何粹夫學嘗積雨行途中苦甚即覓工自南莊至城皆平治之凡士與大比必薦贖之曰此吾里選之賢也一日感寒疾方汗因先人忌辰冒風祀於祖宅疾復作是夕天殞一星光如月落城中次日卒年五十九所著有玉松稿家譜雄山集鄉約集成貞烈倡和集

劉斌長治人正德辛未流賊掠雄山兄穩被虜斌冒險

趨救泣請身代賊怒舉刃加頸斌不為動賊併釋之
王修黎城人會子太學生能文辭有孝行親終廬墓側
呂涇野柵嘗就訪焉世宗朝旌表其門咸陽馬谿田
理許少華宗魯咸為詩贈之

趙世濂襄垣吏員任巡檢罷歸嘉靖八年餓殍盈野捐
地掩骼數千具御史趙鏜奏請旌表

王修身黎城人太學生親終廬墓嘉靖間旌門又馬大
猷邵孟夏俱以廬墓稱孝

王大節長治人父相客死延安以遺腹生及三十五歲
母田亦卒時方為諸生投牒於郡裏糧徒跣遠尋父
骸有高年王萬牙指告所瘞處然恍惚莫可憑恃大
節稽顙顛神擲楮錢視所向求之果得石碣抱屍痛
絕輿還合葬隆慶三年郡邑以聞賜帛表其居

仇楫長治人官宿州吏目與弟森同立家範隆慶時同
居已及六世紀年一百五十旌為義門楫病癰吐瀉
牀褥間子勲每手挈其穢居喪三年不入私室以孝

子旌表

仇大長治人六世同居先後出節烈貞女二十三人萬

歷中旌義門

粟珪長治人成化間捐粟千石旌門又萬歷間郭思極
同母萬氏以捐賑一千三百石旌表

申志臯長治人與弟志伊事親篤孝父歿哀毀骨立志
臯至損一目其母喪明並祈天求代比歿廬墓三年
萬歷間旌為雙孝

張倫長治諸生幼孤事母孝母卒合葬父側負土築墳
廬其間穿井無水焚香拜泣泉湧出事聞旌其門後
由貢生官東阿訓導

張附翔平順人萬厯間貢孝事孀母義周煢獨恂恂
雅飭口不言人過任安化知縣

任翺長治人勤學好義建書塾修橋動以千金計子環
官光祿卿

栗瑤長治人沁源榮靖王儀賓事兄撫弟以恭謹著同

居不私積財第欲異居瑋弗能止乃曰吾不得為張公藝為薛包可也子應宏有文名

徐佩長治人隨征倭寇大戰於八團營賊拔劍徑趨光祿任環所佩急以身當之而死任既得免遂大破賊粟永馨字子明長治人性篤孝幼孤事母務得其歡心比歿手自為志志成書石一字一淚文悉為涕淚所漉至再至三書乃得就由舉人官通州牧有政聲

仇鴻潞州人幼嗜學尤精於史居喪準古禮三年不御

酒肉其後子孫胥以孝義著

張斗南黎城諸生家貧竭力購甘旨父年八旬時嬉戲以悅之

宣化長子諸生父浩卒廬墓三年事聞旌其門

鮑希顏字復軒長子人性至孝家貧舌耕供養主人以
絨襪綿褲饋之不自用歸奉其祖再與之又歸而奉
其父自受寒凍不覺也由進士累官至遼東巡撫

王卿字上賓長子廩生山居養親不就歲薦親歿哀毀

骨立日夕號哭有司表廬稱孝

裴可長子人家貧傭賃奉母日具黍米糕餌無少間母
喪明奉事益謹

邢明教長子人家貧父老病竭力醫治妻高同心色養
不少懈

王丕式長子人純謹克孝親疾籲天乞代比歿喪葬克
致哀盡禮

霍惟德長子諸生事親孝竭心奉養不少怠飲食蔬果

不敢先嘗士林重之

張拱端屯留諸生父歿廬墓形色憔悴幾傷生

楊希賢屯留人嘗受馮寧寄金若干寧死于不知也舉以還之封識宛然

崔仲和襄垣人性孝母疾思飲河水會天旱絕流求無所得露禱於天河流遽通母飲之疾遂愈聞者驚歎仲和官鄆縣令祀鄉賢

連濟民襄垣人父母繼歿枕苫獨居者五年不入內室

不御葷酒不茹蔬鹽有司旌之

王慶襄垣吏員任縣丞施財好義於陽澤門外創建石橋利行人費數百金至今賴之

馬鏜潞城人事母色養兼至母嘗失明晝夜籲天明遂如初官陵山衛教授

高可瞻黎城諸生嫡母王病劇瀉不能起躬自滌除晝夜侍藥餌弗倦比卒悲號哀切媿於所生鄉黨稱之
子鳳鳴孝事嫡母隆暑侍病衣不解帶踰三月亦以

孝稱

牛繼先壺關人節婦路氏子生七日而父歿比長事母
色養備至由貢生官館陶訓導

郭忻壺關舉人父修例授三品武職被誣成獄憤曰吾
父生兒不如緹縈哉及領鄉薦叩首謝天曰是忻理
父冤之日也竭力陳救十年損家貲大半父得出年
老目盲而忻亦面鰲髮脫矣會當計偕中寒不果行
而父歿力疾悲號水漿不入口感重病卒

孫田平順人滔義子事親孝父疾剗股療之

韓雍字陶宇黎城增生少孤家貧教授生徒竭力事孀母暨發嫂母卒哀毀失明子之珮歲貢生明季之珮曾大父避寇於董北村寨忽報寇至封城以守之珮從城堞躍下跣足奔寨跪抱曾大父慟哭寇乃散去時以為孝感著韓氏家訓孫日宣亦貢生代父事祖親疾衣不解帶事繼母不異所生妻郭氏曲盡婦道尤明大義里人稱雙孝

王汝楫黎城諸生崇禎間流寇圍城乘夜踰入楫出油數千斤於周垣上下悉懸燈炬遠燭百步賊謀遂沮又捐米遍給守城夫役胥為盡力邑賴以全

賈夢鯨字禹門長子諸生崇禎九年蝗災捐貲募捕盡納坑中得無害十二年流寇猖獗招鄉勇備器械登陴戒守會蔡懋德來巡見之喜甚亟勞羊酒並賜一方保障額以旌其能

李養志黎城人以孝友著教里中子弟周人饑寒嘗作

砦於卧牛山脊以禦流寇又與諸子登陴守城舉明
經授忻州訓導闖變佯狂歸里以長子甲黃贈文林
郎弟養裕死難

李養裕黎城人崇禎間為本郡理廳掾邢紅狼盤據黎
之西北養裕以兵備移文授千兵職遂歸嚮產設餉
募兵賊逼城下鼓勇登先矢盡力竭被執不屈死城
賴保全立祠歲祀

丘彥常襄垣人崇禎十年捐金修城十三年賑饑出粟

千石全活甚衆

賈待旌襄垣人闖賊勒餉代父受刑自辰至申死而復甦父有疾衣帶不解跬步不離者三月官至信陽州牧

國朝

原良長治人順治己丑姜逆之變母秦為賊兵所執欲犯之奮挺相擊賊怒割其唇良罵愈厲母子皆遇害王運隆貢生姜逆之變同弟運興奉母朱避兵天橋寨

中兵攻寨急母曰我死則不辱矣遂自縊兄弟號泣
展拜畢並投崖死

林茂楠長治人性孝友姜變負母避亂跣行四十里遇
賊驚散痛哭行求得母於保定得父於西安復走壺
關得少弟方亂時有少婦願作配者力却焉比事平
娶妻生子病垂危夢神語曰子固當死帝以汝孝義
故生子病果愈

崔洪憲襄垣諸生順治十八年查邑逋代納數百兩

馬遠長子諸生舌耕供父父好飲常夜醉於外遠每伺人門左竝其出扶掖以歸終身無倦色

李禮門長治人七歲失母號泣不食者三日父天培鰥居三十載雖一飯一寢禮門未嘗不在左右也比較哀毀骨立廬墓三年刊有勸孝歌以勗世

程鈔長治人父堂客死粵東鈔方七歲日夜號泣家貧傭工於人積貲以歸其柩比母喪又以無力安厝憂瘁百端傭工江南而殞世共傷之

崔兆祥長子諸生諸城令自晉養子也自晉被論病卒
家屬坐流徙時自晉子兆瑞年幼兆祥涕泣請代往
格於例不果行遇赦攜兆瑞歸鬻田產復徒步走諸
城迎自晉櫬返葬

裴日章字綠野長子諸生父歿日夜號泣喪葬不遺餘
力母年八十耳目皆廢日章朝夕左右扶掖廁牕依
依孺慕妻吳亦能相夫事姑

范文字素文長子廩生母喪哀毀盡禮父鵬升暮年失

偶左右侍臥不入私寢者數年父喜豪飲素嘗邀父
執供杯斝以博其歡文先父卒臨歿長泣以不獲終
養為恨妻秦氏子五人亦能繼其志

崔良長子諸生弟峙完母程亾父宗義再娶於陳生弟
亭父卒良事繼母撫三弟並至成立創業均產時以
為難

劉瑤襄垣人拾還遺金以義稱

賈燾襄垣諸生事母孝外祖無嗣躬祭掃三十年年七

旬隆冬居喪赤足百日動合古禮又李挺生母疾躬親湯藥終身不敢假手於人父卒哀毀骨立遂大病明年春強掃墓痛哭仆地拯扶起吐血而卒

郭士英襄垣廩生事親孝父病祈藥於潞城齊雲臺旦夕往返二百餘里父疾一年不暫離父故哀毀而殞稱篤孝

李鼎黃字季耳黎城人養志子孝友好施助人婚葬無虛日設粥賑饑者五兵燹後學宮傾圮罄資重修以

貢生授州同知未任卒

李占黃字杏苑黎城縣人主事甲黃從弟少喪父奉母
孝謹而性特豪邁以選貢入太學授天台知縣涖任
三年請告歸以養母母卒終身偶觸輒泣然流涕占
黃撫弟四人胥克有立置義田收租入以贍族歲饑
施粥給種率不責償當任天台時友張天斗傳母訓
曰寧可得罪上官不可得罪百姓占黃恪守之論者

謂為廉孝

卷一百四十二
申明善平順諸生妻石孝事翁姑以疾早世善感其賢
義不再娶鰥居五十載

王三聘平順人父病百方以醫之罔效三聘憂甚一日
夢中聞人語曰爾父病必獲虎肉食之始克愈則躍
然起曰虎肉乃克愈病乎已乃泣然曰吾又安繇得
虎肉而進之久之憬然悟曰虎肉尚可愈病矧股肉
乎吾誠割股肉庸知不效於虎肉遂割股以進父果
立愈或曰割股匪三聘意也三聘不得於虎聊以股

代也或曰三聘勇療父神爰以虎醒之事聞道府躬
詣門給扁以旌

汾州府

北魏

宋瓊字普賢謨子以孝稱母病季秋月思瓜瓊夢想見
之求而遂獲時人異之

郭文恭後魏時為太原令年踰七十父母喪亡文恭孝
慕罔極乃居祖父墓側晨夕拜哭跣足負土培祖父

母墓竭力積年不已見者莫不哀嘆尚書奏聞表其
門閭

唐

鄭興故永安縣人幼有至性父卒水不入口者三日事
母力勤稼穡以供甘旨母病湯藥必親嘗七日不解
帶又割股以療之貞觀元年有司具以聞於朝時適
病縣名與涪州永安同又欲旌興之卓行遂改縣與
所居之里皆曰孝義云

宋

元象始末無考今元象泊其遺跡也舊志稱其有孝行
嘗耕六壁城下

任康節汾陽人少遊學祖母李思之恍惚至側誦佛經
因急歸不復出遊祖母歿哀毀特甚躬爨以養祖父
郝戴石州人家貧竭力養親舉進士歷通山令時年未
五十以父樵老上書請致仕為父求官執政諭使赴
官而後請則可乃留妻子於家獨奉父行踰歲竟謝

事得太子中允以歸及樵卒自負土為墳詔賜粟帛
杜遇官評事儉靜仁慈周貧賑急妻死誓不再娶人稱
長者

元

李邦用介休人少有大志不泥俗學孝弟出於天性後
登進士凡居官教人一以孝弟為先時望歸之

韓子中性孝友弟子同嘗以罪當棄市子中以其子幼
往代其死主帥察知遂免弟罪禮送子中還鄉

按縣志作

忠子

褚巴噶布哈次子布哈為紅巾所虜巴噶冒刃抱父屍

亦見殺

車世榮官鳳翔路陰陽教授以孝旌其門

明

董謙介休人洪武中官醫學訓科好義有勇略時邑山水數發羣議築隄障之謙日夜督課蠲金錢勞其勤者決旬長堤屹立流賊猖獗謙率子瑛壻秦沖提鄉

勇三百人徑搗其巢賊黨驚潰賊復乘夜奄至謙橫
刀搏戰至明子堦復左右翼之賊遠竄不敢復窺介
山人胥稱之

楊智介休人少喪父淡食三年人未嘗見其喜笑後母
喪哀毀廬墓白兔馴擾人謂孝感正統間旌其門

張得滿賈彬俱以輸穀賑饑旌表又王志可正統間輸
賑旌為義民

王玘白海劉儀郭賚正統間俱以輸賑稱義

李冲郭厚楊贇劉雄正統間俱以捐賑旌門又雷應正
萬歷間輸賑千石全活甚衆

梁晟董澄正德間俱以捐賑旌門

韓道兒臨縣人嘉靖十九年俺答兵入境掠其父時年
十七追及之以石擊兵救父得免道兒被殺事聞旌
表從祀

張鈞永寧舉人親老不仕讀書奉養孝聞遠近嘉靖辛
丑俺答兵入寇擄其父去號哭不絕追百餘里流矢

中肩拔去復馳至則父已遇害一痛殞絕稍甦盡飲
父屍遺血水不入口三日而卒事聞旌門

楊經寧鄉諸生嘉靖十九年父遭寇害誓死復仇同子
淑湘提鐵棍四十觔結河南王千觔侯機躡入寇穴
以雪恨邑令旌門

陳訓寧鄉歲貢性醇篤事親誠敬撫姪慈愛特制家訓
長幼恪守無逸志

于博永寧人幼孤年十六讀書城中俺答兵至號歸求

母母已被執道遇之取石擊賊賊剖其心而死母得
道歸嘉靖間旌表

張永安永寧掾吏父為俺答兵所逐持梃追之擊傷二
賊父逸安護其後被數十創死嘉靖間旌表

張更化汾州人事繼母孝與弟同居無間言嘉靖甲子
乙丑聯雋進士授南陽府推官擢監察御史巡視兩
浙鹽政按鳳陽劄卷南畿胥以整飭著出為陝西副
使遷叅政潔身率屬得憲臣體尋丁外艱補湖廣叅

政遷山東按察司使平反冤獄丁內艱復補山東按察司使民聞再至歡甚遷右布政使歷河南左布政使晉階太僕寺卿致仕

曹祿字抑齋汾陽人事親孝凡修城築堤建橋穿井諸義行皆為父祈年而設也萬厯間饑殍遍野買地營塚清明酌酒致祭歲以為常郡人王緝張更化俱有碑記

劉仲原汾陽歲貢母喪廬墓晝夜悲號有盜夜半乞

火與之遂化為善至今人稱其墓為孝子墳云

劉得仁汾陽人歲旱發願禱雨遂自焚死大雨隨注州
司葬至今稱為義塚云

嚴敏汾陽人天性好施衣食棺木藥餌濟人者終身不
倦

賀來佐汾陽人八歲喪父盡哀每日祭墓而後食如是
者三年母病時方九歲廢寢食奉侍藥餌四閱月如
一日比卒五日不食哀毀骨立親友勸解淡食終制

後補博士弟子員

張榮平遙人父患風疾朝夕奉侍二十餘年未嘗處私室比疾篤至為嘗糞父亦尋愈

邵希曾平遙諸生幼孤家貧事母張自甘粗糲曲盡色養母歿歲薦入官恨未祿養哀傷踰禮

趙澄平遙監生母喪廬墓朝夕泣奠塋中草木皆為冬生

李憲平遙人官山東布政司理問食知州俸歷官二十

年號清慎事母親奉甘旨執喪三年出告反面事死
如生士夫並高其行

劉士弘寧鄉諸生叅政有誠子性孝友母蚤喪晝夜為
孺子泣事祖母晨昏定省自為炊爨父遊宦邸呈馳
赴膝下承歡朝夕父疾篤衣不解帶比歿毀幾絕撫
諸弟友愛時共稱之

任良才平遙進士初令江陰遷高郵守所至有聲母病
親嘗糞父病籲天求代誨人亦號勤懇

任義平遙舉人孝思純篤居喪廬墓三年

梁殿邦字元鎮平遙人由舉人令三水幼孤事嫡母閤
生母曹曲盡誠孝居喪守禮不出戶庭者三年

趙宗堯平遙人父歿三年未嘗見齒同弟宗武事母櫛
沐飲食彌勤篤家無私積周貧焚券親族賴之

王欲見字以道平遙諸生讀書守道天性孝友居喪哀
毀踰常坐臥草次四十九日自始喪至大祥斷絕葷
酒蔬菜日惟食粥不入內室禫祭始食菜麵素冠披

髮三年如一出告反面不啻生存

梁州尹平遙人善事父母以孝名父病醫罔效或言割股愈病者慨然曰身親之身也以親之身行殆固不可以親之身已親之疾奚不可且苟可以已親疾雖剖心瀝膽為之豈其一股而難於割乃剗肉類掌糜以進父食之霍然起論者以為孝感

梁州儒平遙人嘗割股以愈母病或曰子寧不自惜耶州儒曰吾惜吾身所以惜吾母也以母而惜身吾有

身吾無母矣夫有身而無母其不自惜也孰甚而子
乃惜吾不自惜乎然則子為名高耶州儒愀然曰吾
知吾母而已奚名之為且當吾母病上天下地無可
著吾身者吾惟母疾是懼而疾之克愈是蘄吾奚知
有名如若言是吾以母市也子休矣蓋州儒之事母
者類如此

武琦介休諸生母喪廬墓時有橫軍作亂逼視廬中圖
書盈几別無長物贊云孝子也去之琦由舉人官陝

西肅府審理

李英俊介休人父天質狂疾投井時方灌園奔掇不及
隨投井中俱死

王延介休人父損病垂危籲天求代又詣城隍廟割股
進之病尋愈

張應堯字心聖介休歲貢事祖父以孝聞兄弟七人同
居立家規十六則復立同居另變法身為家長立農
正工正及副祭祀婚嫁宴會餽遺工作皆有度數家

人千指奉命惟謹人稱義門

靳士龍介休人父世愛偕里人高汝才樵山中汝才奮拳世愛墜崖死母貧羸且遺腹冀萬一生男寢其事已而士龍生喜甚左搯右拄士龍獲長為言父死狀輒泣下士龍亦泣急思雪忿以母輒中止後母卒營葬事訖乃曰復父仇償母志斯其時矣因持挺出要汝才於路擊殺之語人曰四十餘年積恨今日始平遂詣縣首其事或欲列於官士龍曰死吾心也何喋

喋為卒死於獄邑人哀之曰士龍孝子士龍母亦烈女也爰以貞節孝烈旌之

武賢孝義人太學生母失明以舌舐之遂復明父母俱歿每於墓下出告反面尤必倒行百餘步不見墓而始已聞官司傳呼聲雖暗室亦拱立俟之後令元氏以理化民民皆知勸祀名宦

文楊孝義廩生流賊充斥亟走尋父時父在西隣挺身往救乞代不得遂併遇害

張大發孝友好施嘗修橋梁道路及儒學文廟父歿廬墓六年母病為減食飲母卒悲號絕食者數日左右

柩側未嘗頃刻少離

按孝義縣志作大登

李天育孝義廩生父以酒狂詆罵隣里其母抑之房中遂憤極自殺育痛父非命遂絕飲食躄躄哀號三日而卒

田賦孝義人太學生七歲喪父慟毀骨立母病跣步不離額天請代憂瘁之至髮為盡白弟佃遠歸惟刼口

吮瘡血親同臥起緣思母不置遂成病卒鄉人皆稱
為田夫子

尚義字用方孝義人有至性父卒事祖母繼母孝順備
至祖母患青盲日夜哀禱尋果復明

楊樑任國充李異香胥孝義人以剗股愈親疾稱孝
賀進臨縣諸生父膺死罪詣官求代詞極懇切官從之
械獄中聽決者三次後奏請得宥與歲薦

賈銳永寧人性篤孝家貧幼孤事母能竭力致養遠近

皆稱曰賈孝子母卒年九十八銳亦六十七矣哀毀
廬墓遂卒於塋

高節溫勵武衛並臨縣人以廬墓稱孝

白惟能臨縣人歲荒輸賑千石事聞旌表給冠帶

甯孟魁石樓人事親篤孝承顏順志跬步不離事無大
小稟命而後行父病衣不解帶者五十餘日比歿斷
絕葷酒獨居三年

許汝元石樓人父歿逋負數百金汝元語三弟曰逋不

能償何以安亡靈於地下悉以償人而遺汝輩以饑寒非父意也更為券自任以父業盡分三弟後倅寧州所得俸盡代償前逋訓諸弟胥成立當事扁其門曰孝友之門

賀希孔石樓諸生母張早喪事父仲賓嘗從永和負米作供色養備至父病露禱願減己年以益親算比終廬墓三年撫弟稱友愛

鄭登雲石樓人父病垂危割股作羹以愈之生平好施

樂善後遇賊難不屈而死

晉賢石樓人六世同居孝友婣睦事聞旌為義門

王錫永寧舉人官洛川教諭性篤孝父輔商歿山東扶

柩西歸野宿不避雨雪既葬廬墓三年時早霜殺禾

塋左右獨無恙人謂孝感補任曹縣母喪亦如之斷

絕菜鹽形瘁骨立知州王道三請歸謝曰墳死足矣

竟卒

張雷魏廣俱永寧人正統六年輸賑一千石授義民散

官

張格永寧諸生負母避難遇賊欲刃其母哭泣代死母
被傷罵賊而斃

王爾梅永寧貢生官太原府訓導親歿廬墓三年

陳謨寧鄉人訓之弟事親敬兄以孝讓聞親喪廬墓六
年訓亦有孝行

楊聯芳寧鄉諸生歲值凶荒兄弟俱困多方借賑以悅
親心父疾不解帶者七十日母疾侍側三月憂勞

成疾合葬廬墓二年終制未嘗葷酒入口

王伯誠寧鄉人親歿廬墓茹淡肩苦終身不渝又李士光歲貢生亦廬墓又張霈武舉廬墓六載

史勉寧鄉人少喪母事繼母如生母居父喪以疾卒王子深寧鄉人拾還遺金以義稱

梁國棟永寧人性孝友閭賊陷城衛父被砍四刃父遇害罵賊求死賊曰孝子也釋之時季父及弟亦為賊殺國棟備棺掩葬負母出城隱居而終

張承相永寧人父卒事母以孝聞寇至母被執奔救遂
俱遇害賊退爭往視之相屍尚抱其母之首也有司
申請立孝烈碑

李元滋石樓人庠生性謹厚學淹經史崇禎五年闖賊
執之罵不絕口冒刃而死旌曰義士

孫士亭臨縣人扶父避賊賊追及射其父亟持鋤奔賊
擊之賊棄弓矢走引羣賊共射士亭身中十七矢死
父逸得免事聞旌表從祀

宋朝用介休人嘗拾金五百訴於縣訪還又水口有客
寄貨其家值千餘兩闖賊入寇蹤跡無存訪知客僕
如數付之時人高其義

董時習溫徽周貧好施並介休人以義稱徽尤工寫竹
嫻弓矢流寇圍城發三彈三中賊遂解去

王尚龍字雲從平遙人由恩貢官至陝州牧事父文俊
母白胥得歡心闖賊勒餉受箠楚密戒家人不令二
親知之生憂怖也後父壽百歲母亦九十二歲

楊正春字榮初汾陽人補博士弟子賊將臨門正春繞屋走有兩賊排圍捉去使飲馬他所正春曰是辱我也薄暮具衣冠如孔廟瞻拜痛哭隨投井是夜見夢於室人曰我得死所矣但水寒沁骨盍早出諸室人夜起而號徧覓不得次夜復夢曰我在府學井中何他求也往視果然正春入廟時有乞兒見之言其狀云

賈守亨字通吾汾陽人少任俠不羈賊氛起時偕里中

好事者習射東郊賊入境人多謀出迎守亨不許賊入室戟手大罵與格鬪隨手而倒後賊衆梃亂下守亨給曰汝不過欲得財耳我有伏藏為汝採取汝不得唐突以辱我賊諾守亨入拔刃大叫自剖其腹血濺於壁腸委於地賊驚走

馮運泰字來吉汾陽人為諸生豪宕自喜善屬文閩賊入晉運泰拉同儕日夜畫墨守策數上當事乘城之法運泰為最悉賊謀廣布方薄城即使使縛運泰以

見運秦聞之仰天嘆曰死則死耳安有昂藏丈夫而受賊刑辱哉遂投井死里人收殮如禮題曰明殉節處士馮生之柩

國朝

孟之俊介休廩生身感重病順治六年大兵討姜瓖餘黨軍於辛武堡前其弟誤放炮火櫻罪至死俊力疾起曰吾久為棄人弟在猶可承業理家請身代之邀寬法薄笞舁歸飲食如舊病亦旋愈

劉漢裔汾陽諸生母卒廬墓三年

張芑介休人甫二歲父客遠方六歲避亂母子伶仃比
長遠尋吳越負父柩以歸事母孝敬備至母喪哀毀
骨立築室墓傍飲食必奠人皆稱之

魏之憲汾陽貢生事母三十餘年曲盡孝敬母病衣不
解帶目不交睫禱神求代次日果愈比歿哀毀盡禮
觀者泣下康熙三十一年旌表

趙日昌汾陽舉人康熙辛丑捐賑三千金祀鄉賢

李日耀汾陽舉人子忠森孝森節森康熙辛丑捐賑六
百餘金又張英年九十倡義捐賑三百金左都御史
朱軾題請旌表又郎中田周捐賑六千兩肇慶知府
韓謨捐賑六百兩候選知縣卞懷仁家共捐三千兩
其餘捐賑有差

范三拔介休人康熙六十年捐賑五千兩又助修文廟
多義行祀鄉賢

梁璠孝義諸生性廉潔路拾遺金亟求其人還之義不

受酬雍正七年事聞

賜以恩貢加司訓銜以獎之

張國珍字乾修介休人性至孝父歿哀毀幾絕事母及
繼母備極孝道胞弟三人並登古稀情好益篤同居
教育子姪俱列膠庠歲饑出粟賑濟者數次代人完
拖欠獨力建修堡牆西面百十餘丈又首倡捐貲募
衆共修全完所著詩數卷易書評解四栢齋文集學
憲沈贊其斷論平和攷據精核可括紫陽綱目由歲

貢任太原府訓導卒於官人咸思慕

山西通志卷一百四十二

欽定四庫全書

山西通志卷一百四十三

孝義

三

大同府

北魏

封萬護代人敕文之長子也敕文卒萬護當襲天水公讓爵於弟翰於時讓者唯萬護及元氏侯趙辟惡子元伯讓其弟次興朝廷義而許之

長孫慮代人母飲酒父真呵叱之誤以杖擊致死真處
重坐慮列辭尚書云父母忿爭本無餘惡直以謬誤一
朝橫禍今母喪未殯父命旦夕慮兄弟五人並沖幼慮
身居長今年纔十有一女弟向始四歲更相鞠養不能
保全父若就刑交墮溝壑乞以身代老父命使嬰弱
衆孤得蒙存立尚書奏云慮於父為孝子於弟為仁兄
尋情究狀特可矜感孝文帝詔特恕其父死從遠流

北周

王德代人父喪家貧賣男公奴並一女以營葬事歷位
車騎大將軍從周文累戰有功歷河涇二州刺史爵
河間郡公

金

孟興雲內州人明昌三年四月戊午詔賜雲內孝子孟
興絹十匹粟二十石

元

賈進大德中地震居民死傷無算且艱食進乃死予棺

傷子藥饑者計口給粟冬則寒者衣之又市郭卜地
為義塚里中賴以活者甚衆

袁表性孝祖衰老父吉家貧莫能供菽水杞載乃翁送
山中歸投杞於薪表取而懸之吉詰曰兒誤矣懸此
何施表泣對曰預為阿翁具吉聞之俛首表知父悔
悟乃引杞循故徑載翁以還至今杞跡所歷處草皆
偃

明

謝定柱廣昌人性孝方十二歲母周抱弟尋牛為虎銜
去定柱揚鞭逐之得脫負弟扶母而行虎復追嚙母
頸逐如前甫行數步虎又嚙母右足舉石奮擊虎乃
去永樂間工部侍郎霍方以事聞召見慰嘉其孝勇
賜鈔旌門

沈文義事親孝父病走恒嶽祈代病尋愈壽至八十有
六讀書好義置學田五十畝助族中婚喪資商文恪
為著傳

焦鑑大同府諸生侍父不離左右家貧勉致甘鮮父卒
哀毀柴立匍匐墓側悲號不徹所親以減生非孝勸
之鑑曰父亡何歸即從父於九原固無憾廬墓三年
足不入城成化六年奉詔旌

楊茂楊瑞胥大同人成化以孝旌

王經應州廩生事繼母汪以孝聞母卒廬墓成化間旌
表

王誠渾源人官任丘縣丞父卒廬墓烏兔馴聚成化間

旌表

按州志作
慶都丞

張瑞大同人母卒廬墓父振止之父卒遂廬墓側插部
內侵堅守不去事聞旌表父由舉人官邳州牧瑞亦
以貢令環縣有惠政

楊清澄雲內人週歲父卒母邵氏藉縫紉哺兒澄五歲
向母索父母泣曰爾父在我安得貧苦至此攜之墓
所澄竟日呱呱泣不絕長力養母母病割股為羹食
之旋愈

盧鉞大同人三歲失母父達不再娶以托寡嫂楊氏遂
雲遊鉞八歲忽哭痛曰母則亡矣寧無父乎楊告之
故正德間鉞由監生授河南左長史棄官尋父誓不
得父不歸數載至平涼泣禱於神依夢往翠屏山遇
老人楊譽如夢所見則其父奕友也父歿已久鉞易
棺函骨見有棋子為殉宛然不朽會兵圍平涼鉞獨
守柩不離賊曰此中有孝子害之不祥遂解圍去事
聞賜達為義夫贈承德郎鉞為孝子封亞中大夫旌

門

溫鉞大同人父景清有膽力嘉靖三年鎮兵殺巡撫張文錦其後巡撫蔡天祐令景清密捕首惡戮數人其黨恨之十三年殺總兵李瑾因遍索景清深匿不出遂執鉞及其母王氏令言所在鉞曰爾欲殺我父而使言是我殺父也如讐不可解則殺我舒憤足也賊不聽逼母使言母大罵不輟賊怒支解以恠鉞鉞大哭且罵并被殺事平母子並獲旌

喬景華山陰人嘉靖間扶母避寇其父稍後見執華復
奔救翼之右臂受刃更易左臂父子仆地寇感其孝
而去

李雲鳳靈丘人嘉靖間兵防乏餉鳳以布衣持數百金
走大同攜軍事聞旌表

趙榮貴大同人事嫠母張跬步不離母疾刲股進之終
不起哀毀廬墓成疾而卒

陸應祥大同人六世同居人無間言

李滿大同人力田好周濟子承弼承式胥取科第

朱充燿字淑川大同人幼孤哀毀如成人事母克孝母卒廬墓三載

王琳字獻雍大同貢生有學行事繼母撫幼弟以孝友稱賑饑掩骼人多其高義

麻登雲右衛人父剛患寒疾醫曰糞甜則愈嘗之覺苦哭赴城隍祠祈以身代父思肉食割股進之疾遂愈朱鼎瀆奉國將軍父病嘗糞祈代比卒竭力治喪葬日

雪甚仰天哀禱忽得晴霽事母亦孝詔賜四品服金
千兩

武彥爵大同人冠帶總旗母疾呼天求代尋疾愈比卒
哀毀廬墓三年

王汝濂懷仁進士年五十例得銓用以母在托疾歸養
母卒日夕跪哭隆冬忘寒以鶴膝疾終

曹得懷仁人由燕山左護衛總旗從平內難勇銳前奮
以一當百累陞中軍都督同知守德州御下不苛

王志仁懷仁人有孝行父母不睦竭力調持母疾左右
嘗藥比卒哀戚三年父性甚嚴而持憐其孝云

王憲武山陰貢生好義樂善嘗返外家裝資却從兄絕
產全難婦贖人妻子家屏位至宰輔

梁祥山陰人多善行修葺孔廟及城隍諸祠胥捐已貲
人服其義子睿令上猶

張錦山陰人妻死義不再娶有司旌其門

成以簡字可臨別號居吾其先文水人徙居山陰至中

承祥符祥符子三長以蒙孝廉次以愚諸生季即以簡也幼喪母撫於繼母周年十六食餼父卒以蒙繼亡以簡事繼母嫠嫂盡誠敬撫兄遺孤成人好客喜施予急人患難里中豪猾侮善良力爭之雖挫折不回卒年四十六王濬初為作傳

馬璧山陰人四世同居父卒廬墓事繼母以孝聞旌表唐鑑應州人官都指揮母疾割股療之

田盛應州諸生拾還遺金三百兩人以為難子二胥登

科

孫震渾源人性孝父病祈天求代母病割股以進皆獲
愈震孫逢吉官至布政

石鼎渾源諸生父彥芳歿哀毀廬墓會大雨山漲木石
漂沈伏墓號泣水將及墓忽分為兩從旁潰出事聞
旌表

董莒廣靈諸生父宗顯令寇縣父卒哀毀骨立散財與
弟事繼母如所生以孝友著由貢生官壽州判

趙昌齡廣靈人母卒廬墓三年由貢生令封邱柘城二邑廉能有聲

吳成紀廣昌人家貧篤孝親歿穴土廬墓猛獸胥避之高鑑舉人官至花馬池叅議親歿廬墓用襟包土填塚三年塚高如丘

張四月兒廣昌人父樂與伯爭地構訟將盟諸神泣曰爭地事小傷生事大有如誓靈伯與父一也吾誰依乎是時兒方十歲伯與父感其言怨遂釋

紀熊事母李出告反面以孝聞母卒哀毀骨立三年無
喜容妻薛亦有孝行熊後官雲石堡操守

胡登應州貢生官鎮江經歷父世嚴羈塞外登具狀總
督請得兵衛出塞力拯父以歸又崇禎間與劉大順
董則成捐金給夫守城人多其義年八十卒

李夔懷仁人家貧親老以貢任潼關訓導少得束脩即
乞歸養親卒廬墓避寇入城曰某不敢以父母遺軀
恣賊毒手也寇退復廬墓終喪子某官叅議

李若葵大同廩生崇禎十七年閩變與兄象葵弟諸生
心葵姪柱周衣冠拜畢題壁曰一門完節偕婦女五
口俱縊死

郭璘性孝闖賊勒餉代父受刑父名大貴官鄆縣丞多
義行鄉里稱為善人父歿廬墓茹素三年不內處

國朝

韓一蘇廣靈縣人性醇謹與弟一歐事父諸生廷和以
孝著順治元年闖寇敗歸所過剽掠至南和縛廷和

去二人奔赴賊營各祈以身代賊挺刃交下一歐血
肉立糜爛一蘇亦垂斃氣息裁支綴猶祈免其父不
少止賊黨有義之者因釋其父後賊退一蘇復甦知
父獲免喜曰吾雖死無憾而不能不痛弟之死於劇
賊也久之漸起事其父以壽終當時謂二人生死殊
途純孝一轍

于懷漢懷仁人事母孝得旌表又多義行撫孤姪設義
學贖人口周貧乏樂善不倦康熙甲辰蠲賑千石全

活甚衆副使曹溶長歌以美其事大司寇魏象樞和
之子應心亦有父風

王逢泰大同縣人拔貢生世讀書以博義聞幼時父之
雲攜其兄出游獨與母楊居姜瓖之變母死於井逢
泰泣血殯母訖徒步數千里訪父兄倏遇父金陵父
言汝兄奄逝逢泰聲淚胥咽尋奉父歸里父年八十
餘以壽卒逢泰詣墓下輒攀栢哀號不能止沒齒不
衰太守葉著孝子傳以風焉

武嵩齡大同前衛人幼孤隨兄奉母遷畿南年十五母卒扶襯歸葬遍覓父塋不得號泣數日掘地見棺遂以合葬又多義行修學宮周貧乏官天津守備祀鄉賢樊榮天性孝友父棄一孕妾生子於外父歿收養至成立人亟稱之施藥施椽修橋焚券好善不倦云陳嘉猷渾源州人恩貢生性嗜義不苟取與一日道中拾遺金二百八十兩坐以俟之旋見有緣道來者鬱鬱不自得嘉猷不言堅坐少頃見其人嘆息淚下因

亟問君何苦其人為言失金狀數適符則亟慰之曰
無憂金故在君速持歸遽付之其人媿謝固請姓名
嘉猷一笑而去後所司以事上之府府給扁旌焉

蘭朝海廣靈人以孝稱又嘗拾還遺金

吳之琳陽高人諸生以孝友旌門姪振宗早夭母老子
幼琳為經紀其家二十年無間言又有徐某寄金百
兩徐死而子不知也如數還之又嘗拾還遺金人稱
其義

曹更新陽高人七世同居有江州陳氏遺風士論多之
朔平府

隋

皮宿達景和少子開皇中通事舍人母憂起復將赴京
辭靈慟哭而絕久而復蘇不能下食三日卒

明

吳順朔州人父病閉結藥不能通泣而舐之又病瘦嘗
其糞若喜曰是固無恙亦以醫治得愈父思雉羹遠

索不得忽雉飛墮其家作羹以進父卒時順年已七十矣哀毀廬墓終制正統間詔旌九十賜爵一級壽百餘歲而歿又有孫文官訓導廬墓六年

馬瑠右衛指揮舍人性至孝父祿行高蘇州歿旅邸瑠欲取父屍母以年幼不許瑠曰父死不葬何以自立於天地間遂自縊繩斷聞人語曰汝自去可保無虞遂與兄璋負父屍還葬終身養母不懈

陳宗堯左衛人嘉靖丁巳年父定被掠閱八月定死宗

堯潛往化屍還葬撫按上其事賜賞賚以旌之

孫文朔州生員以廬墓稱孝父卒廬墓三年母亦如之
有司以聞旌表

覃師孔苑馬寺卿父應元令歷城師孔隨任早作夜眠
以慰父勞父病顛天求代卒後事母色養備至以孝
稱

國朝

郭建村有孝行時有葉成才者違法論斬建父鳳林伯

鳳山連坐當死建曰父生我身願以身代遂斬鳳山
子安亦乞代父監者謂山年老一子不許時咸以為
難

牛射斗平魯人勇悍而慈厚好施人多德之初銓守備
累擢任康熙五十六年為貴州威寧鎮總兵卒於官
盧時泰字靖寰朔州人雅好樓居而樓臨大道故貿易
地也旦起必讀書其上有閭姓攜五十金來易米未
及授金會沽酒醉去遺金於梯後時泰得之告父淳

修曰此必閭物也父長者先試時秦曰汝聊藏之時
秦曰他人物藏之何為兒必不以五十金喪平生父
喜曰是吾心也翼日閭復至請緩期俟異日時秦曰
無庸五十金在是遽出示之閭愕然請中分時秦固
不受人皆高其義

趙亨清左雲氏也偶有營兵劉朝選領饗歸伍路遺其
銀亨清拾而還之朝選請中分而亨清不受雍正八
年事聞旌賞

寧武府

北齊

宇文顥周文帝長兄性至孝居母王氏喪哀毀過禮父肱與衛可瓌戰墜馬顥與數騎奔救乃免顥遂戰歿保定初追贈大冢宰封邵國公諡曰惠三子什肥導護

明

杜登第偏關人幼孤事母劉甚孝宴會必懷鮮遺母以

明經任河南少尹

楊春時偏關人事嫠母張得歡心有所訓跪而受之官

開州牧

徐時進偏關貢生性孝友母卒父以時進孝不再娶

萬邦應偏關諸生父世武以鹽引事下獄論死號泣求
代卒免父歿扶柩歸竟入關城曰刑罰是甘不忍置
父郭外又族姪某將為變苦勸不從曰吾寧身試百
刃不忍目擊赤族也觸牆而死妻宋無子以節著

賈三光字孟明偏關廩生客寧武周鎮所闖賊圍城周
贈百金促行三光曰公為君死吾寧不為公死乎城
陷自盡

國朝

韓萬善字復初偏關諸生母楊性頗嚴少有所拂即加
笞擊臥病十餘載萬善朝夕事奉無少懈比卒嘗慟
念曰求母朴責不可得矣督學旌之

趙玉字小河偏關縣人萬姓鬻鹽客也古朴敦氣誼姜

逆之變萬頗回惑玉力諫不聽已復涕泣道之辭甚
苦亦不聽遂走郊外古廟中自縊以死懷中自書一
紙曰吾妻賢子孝可無死第緣主人失算禍變將作
遂爾先期捐軀有知吾者持此白主人則吾瞑目於
地下矣蓋以尸諫也萬訖不悟旋罹禍

弓大成字樂天偏關縣人姜逆之變遣其黨圍老營堡
時堡將羅他出或欲延賊入大成獨不可曰死生有
命奈何以從逆生子乃登城誑之曰堡小且無兵固

願隸麾下第昏夜難辨俟黎明當啟門也賊信之伏城外已而潛發大砲礮大橫飛賊死無算羅亦統兵來援賊衆大潰堡獲全羅給守備劄大成固辭不受梁有慶字善優偏關廩生父疾嘗糞以孝稱

陳玘兆偏關人家貧未娶無姊妹繼母患癰三載手為櫛沐負販供養後父患癰孝亦如之

武揚偏關人四世同居食指百計量才授任家無間言弟名亦能守其傳又有王家賓亦四世同居稱義

澤州府

北魏

蔡祐事親孝屋側產芝草人以為孝感官都督所得俸
盡給族之貧乏者及卒家無餘貲人皆義之

隋

田德懋高平人父仁恭開皇初以父軍功賜爵平原郡
公丁父艱哀毀骨立廬於墓側負土成墳文帝聞而
嘉之詔表其閭

張宗古高平人幼負大志父母早逝或勸之仕曰仕以
行志也親老而養不逮吾志安乎終身不言仕進樂善
喜施嫁宗戚之孤女五人瘞貧乏者十餘喪人稱孝
義

金

李森高平人異次子年十八澤州發解第一授萊州文
學天會間歲大饑斗米千錢餓殍載道出粟千斛賑
之活者甚衆或曰易此可得數千緡森笑曰活人數

千不愈於數千緡乎途遇行旅二人病臥垂死掖至家醫治全愈其人感泣而去蓋襄陽人也每森生辰各持方物至而祝之

張完父早亡事母以孝母久病妻養母有怠即出之會歲祲出粟賑饑多所全活有貸錢者百餘人度不能償盡焚其券

趙振性質淳厚樂施予父歿哀感三年人稱其孝析居資產讓兄擇自取其薄里中貧不能葬者悉為賙賻

又施藥救人全活者多遇異人曰公陰隲厚後必光大其門至天眷中二子安時樂榮皆狀元及第

元

李義蚤喪母繼母龐氏鞠義如己出義孝龐氏如所生龐有疾醫不效義懇禱北辰祈以身代乃密割股肉和糜以進跪告曰兒別得神藥飲之即愈已而果愈人問其故終不言久之人見其脇左有刀痕知為割股救親詔旌表後以子廷實貴贈嘉議大夫兵部尚

書

和居中性敏博學篤於交游潛德弗耀以高年耆德旌表其門

明

王仲達洪武二年舉孝廉令中江秩滿乞歸終養永樂間徵取堅志乞養如初賜敕獎諭給鈔錠以歸

景寧族指千餘五世同居洪武初旌門

王敬高平人飭躬勵行洪武初舉秀才母喪徬徨墓所

不忍歸者數日父歿廬墓哭奠者三年永樂間旌表
子璲由舉人官太僕寺丞父母繼逝廬墓六年事聞

旌表

按府志
璲作璲

王起孝高平人正統中以孝被旌

郭文會陽城人正統間輸賑二千石旌表又有粟文輝

陳大億吳奎俱捐賑旌門

徐璣趙翱並陵川人正統天順間輸賑旌表

李承恩沁水舉人令良鄉曾隨父瀚官南省會賊竊敕

去追寇索還父歿忽火起他所將延及樞承恩泣禱
火遂反

侯完侯永趙獻何真正統間各輸米二千斛陳鳳程璟
李綱成化間各輸米四百斛柳富春萬曆間輸粟千
斛李泮亦輸五百斛俱以蠲賑旌表

楊砥字大用進士官太僕寺卿父歿廬墓母喪賜鈔千
錠扶輿步行歸葬以足疾卒

李振民高平人有孝行父歿哀毀廬墓會早霜殺禾近

墓者獨不為災成化間旌表又楊汝節張養心俱廬墓又李璟舉人令臨淄廬墓

徐潮徐鉞徐鑰徐樑武鶴王興胥陵川人成化間輸賑旌表甯溫甯演弘治間輸賑旌表

徐梁五世同居弘治間旌表

按梁祖亦名徐璣疑即陽城徐湏子也

李用澤州人舉於鄉弘治中以孝被旌

裴椿歲貢生幼孤事母孝母歿廬墓母素嗜茄遂種於墓側茄生連理更有烏巢鶴翔之異弘治間旌表又

進士鍾鑑父卒廬墓

賈志儒陽城人兄弟五人亡其三撫孤姪十數輩婚娶教養皆至成立居鄉亦有王彥方風

田祺陽城人夙以孝稱正德間父母繼歿廬墓六年制終以孝子例冠帶

田自修陽城人事繼母孝與異母弟終身同爨撫孤姪如己子臺使旌之

牛耕陵川人正德六年流賊陳卿率衆突入太行至平

城鎮執耕問曰陵川與壺關孰遠近耕給曰壺關近
且平陵川遠且險至壺關界問衆尚遠賊以誑已遂
刃耕於西火鎮而二邑胥免難

李濡陵川人立家塾訓子弟共敦親睦自曾祖約祖景
隆父盛至子珂孫鍾六世同居事聞旌表

曹民信陵川諸生居喪骨見衣表事繼母讓兄產以孝
友著事聞旌門又嘗與弟民悅出粟賑饑里人頌之
王一欽陵川廩生七歲母死繼母張虐遇之父以為言

欽常諫止比父歿張病嘗藥祈代孝謹益甚母竟化
焉第一鉢亦有王覽風

趙友益沁水廩生父九思疾嘗藥禱神力求代得籤有
金鼎折足語泣曰吾父三昆弟鼎折足凶兆也再禱
於神又得問壽九九終之語悟曰予亦兄弟三人三
人中惟予有子子可代父應在予乎尋果疾誓不醫
藥以九月九日卒父疾亦愈事聞旌表又諸生竇縉
竇綬王喜表維新俱以廬墓旌

張希魯沁水人天性孝友少商遊母偶疽發旅邸輒心
動歸療之尋愈人以為孝感昆弟五人魯最少長兄
卒姪變復蚤卒婦靳氏娠魯顓天願生男育培德百
方撫恤靳感之霜操彌堅季兄歿止一女悉以遺財
為嫁資仲兄乏生計分析雖久屢贈千金無吝色生
平好施予親隣待以舉火者數十家萬歷丙戌歲大
祲輸粟千石詔建坊旌之有兄希曾亦義士同心捐
粟時並旌焉

霍一楠沁水諸生父客秦而病千里迎歸左右侍養會
歲試刻不忍離遂至除名

秦德沁水人性孝友兄恭無子酗酒殺人德請代罪御
史行縣疑其獄德恐不利於兄誣服棄市妻潘年方
廿五字孤以節終

張道澍沁水廩生父鎗老而鰥卧起飲食澍必躬親其
事嘗外歸聞父上牀失足傷額號慟口吮血痕左右
不離時一子痘危甚澍未嘗一視也然卒無恙人謂

純孝所致

劉希曾沁水人子用韓孫光月曾孫奕昌元孫洪澤五世同居又楊崇詔子齊芳呈芳兄弟終身同爨如父命

韓肫仁沁水進士官青州守請終養旌表孝行加一級
裴爵春之子沁水舉人令豐縣父喪棄官奔葬立祠隧
道晨夕哭奠補令臨漳迎養嫠母母喪哀毀如禮置
祭田建社學修家規里人歸厚焉

張廷沁水諸生事繼母柳孝館杭州聞母病急馳歸與
婦楊嘗藥祈代目不交睫者五旬縣旌之刻其事於
碑

韓瑒沁水諸生幼孤奉母馬稱篤孝母歿哭曰與母相
依母死我何生為疽發背七日死瑒性剛有胆寇急
張督師致行間談兵事聞祖母病辭歸不出歲饑民
走縣議勦徙單騎叩壘諭之賊遂解善醫旁及青烏
術工書法尤善擘窠大字

朱成錢宗室輔國將軍事親克孝親歿廬墓各三年嘉靖間旌之

石文奎自高祖玉歷五世同居食指千餘無異意嘉靖間旌表

侯勲鳳臺人大司馬璉五世孫父疾温衾嘗藥跬步不離比歿哀毀幾絕廬墓哭奠羣鳥常悲鳴樹上父夔官錦衣衛指揮僉事例得世襲勲堅辭讓弟時稱孝

友

按孝子傳是沁水人

馬宗盛鳳臺人幼孤事母孝母亡哀毀廬墓三年不櫛髮至結羶盡落時有白猿慈烏集塚之異事聞旌表

按孝子傳
作沁水人

宋甫鳳臺舉人官忠州牧父歿廬墓旌表又有張祿張祐張智兄弟共廬母墓楊繼宗有詩美之見碑刻

張垂芳陽城人有義行萬厯聞以輸賑旌表

秦一清鳳臺諸生事大父父母以孝聞時有家難悉賴調維母喪哀毀盡禮朔望必至墓展拜事繼母撫異

母弟人無間言

按孝子傳
作沁水人

孟瀚自祖林至姪霓五世同居財無私蓄庭無間言人

高其義

朱充煙明宗室輔國中尉孝友雅飭焚券賑粟施惠三

十載瘞骼千餘又有仕塿成銀聰藻

一作
涑

俊昶充俊

俱以孝義旌表賑荒勤學皆稱賢王孫云

姬國瑞高平諸生撫弟國瑞有恩意比歿瑞撫其子顯
庭亦如之會水漲瑞挈孤姪跨馬疾馳而聽二子徒

涉曰義不得以吾子先兄子竟兩全焉顯庭舉鄉薦
不仕隱於醫

裴養志高平農夫也有罪人匿里中波及志兄養正論
死力請代刑已而兩釋時共稱之

田應運高平人事繼母孝撫諸弟有恩意又多義行出
粟賑饑子大良諸生有父風嘗獨修學宮泮池又徐
行善孝事繼母學使表繼咸飭縣旌表

王鳳翔陽城人事親竭力跬步不忍暫離生事死葬俱

以禮飛蝗害稼過其田不食人謂孝感

成靖寧陽城人天性篤孝幼喪母悲不自持父喪擗踊
慟悼幾滅性水漿不入口三日既殯結草廬墓側僅
容膝晨夕泣奠三年如一日時有烏鳥白兔之祥人
以為孝感所致有司聞於撫按一扁其門曰孝行
延人秀陽城諸生負氣節遇賊被執索金不得賊曰即
無金敢不跪耶秀曰我膝可屈必不肯屈於賊賊怒
斷其臂而去

賈之鳳字儀虞陽城進士初任正定推官父令定陶寢疾之鳳棄官晝夜馳七百里相見永訣歷官酒泉按察使弟之龍亦有孝友聲

吳茂字德容陽城人母卒食粥啖糞哀毀廬墓地苦無水掘得甘泉並有瓜生並蒂之異楊繼宗作詩序以紀其事

陳思孟陽城諸生父仲廬墓感白兔金雀詔旌孝廉思孟事嫠母亦以孝聞母歿廬墓三年猶子炳失怙恃

至是亦移居祠堂朝夕哭奠哀毀成疾卒縣令立石
道傍題云陳氏三世廬墓處又同縣原井田諸生于
大復俱廬墓

李博陽城諸生父歿寇至守柩不去賊入百計哀求乞
全父柩賊不從竟被害妻延亦自經死

徐滔陽城人自祖貴祖伋祖璣父鉞以來謙謹尚義至
滔義行尤篤子梁孫輝七世同居事聞旌表

王海字大量陽城人立義學建義塚賑貧乏助婚喪惟

恐不及

白含章含秀兄弟也家陽城避亂遇賊傾囊求釋不得
章曰乞殺我舍弟弟尚無子秀曰一家衣食惟兄盍殺
我舍兄賊義而俱釋之

衛吾良陽城貢生性孝母疾浣滌廁牘皆躬為之不解
衣者四閱歲

喬彬字監周陽城人十歲喪父盡禮如成人侍母田病
十年不懈率弟朴力學後先為諸生朴卒強博母歡

而私居號慟不輟撫姪彌厚咸稱喬孝子

婁西陵川諸生母疾朝夕左右盛暑不怠比歿哀毀廬墓三年又貢生徐河及從弟徐漢俱廬墓稱孝

婁陵雲陵川諸生父疾衣不解帶父歿廬墓三年

婁銓陵川人父疾日夕奉事久而不倦又隆冬思瓜冒雪走求不憚百里比歿負土成墳哀毀踰禮家貧事母亦得歡心

李培秀陵川人性孝太母年八十疾秀割股以進人以

為難

宋廷彥字聚奎陵川貢生善事嫠母又徐居仁字壽軒
諸生俱以孝旌又徐騰雲徐啓昌王佐才王國材武

立綱俱稱孝

許論沁水人母病垂危割臂以進病果愈

按府志
作許倫

竇如珂沁水人母卒廬墓三載以孝稱

段讓沁水人孝友端方兄弟共爨至終身工詩兼通陰

陽方脈諸術

王希聖沁水舉人幼孤貧與弟淑聖孝友甚篤時稱二難

張瑩沁水諸生母死粥食三年不除腰經與二弟同居終身無異產

趙家珍沁水廩生幼孤母竇教之成立珍色養兼盡崇禎間旌孝行

趙永健沁水人幼失恃父家璉繼娶商氏撫之極慈永健事商如所生以孝著及壯食廩不幸卒商與媳呂

撫遺腹子呂事姑竇氏備極辛苦會竇卒家理亦卒
商雉經以殉呂救得甦姑婦相依矢志靡他賢慈孝
節並萃一門焉

趙完璧沁水人崇禎五年紫金梁亂奉母王及妻李避
守高樓賊用火攻之李先自縊璧依老母不去同死
烈焰中

王梓沁水人遇賊互相搏擊賊執之不屈而死賊復以
刃脇其妻劉劉抱梓屍大罵見殺

衛天民字志伊沁水人有文名父鰥侍養不離左右推
田子弟由舉人官濱州牧卒於任子思濂副榜未弱
冠迎喪歸次子思洛崇禎六年流賊屠城被縛不屈
死妻尚媳李抱子攜女並投火死

國朝

孔興晉父卒廬墓三年又有張所蘊字冀山亦以廬墓
稱孝

牛魁斗陵川人幼孤奉母克孝家貧不能就師教恒從

母績分光授讀卒以諸生試高等母輒然自傷父不及見也母病魁斗奉侍不離左右先是崇禎間負母避寇寇執其母祈請甚哀賊曰此牛孝子也遂舍之王重新陽城人沈厚寡言饒智畧明崇禎壬申寇亂見執僕某請以身代賊義而俱釋之捐貲築城輸金七十卒賴以安庚辰煮粥賑饑全活甚衆闖將劉忠攻城亟募死士馳報王師大軍至圍遂解順治六年大兵征姜逆遣人詣所在自白不叛狀胥免勦洗

生平助婚葬治道路義行不可指屈及卒白司寇嘆
曰吾鄉布衣無人矣為誌載其行

田雨時字商霖陽城人性剛正嗜讀書尤邃於易嘗以
皇極經世書証史不差系泰明季闖賊渡河遣其黨
徇澤潞邑人議迎賊以紓禍雨時為諸生抗大義
斥之乃止比賊至攜子徽典猶子慎典避山谷而慎
典幼且孤負之以走雖失其少子不顧後乃徐求得
之年八十二卒仇少宰兆鰲志其墓後祠鄉賢陳文

正廷敬撰記

衛正心字翼中鳳臺人官福陝中軍守備歸設義塾建
文華書院入腴田贍之造迎旭橋永安堡平道路給
貧乏里民立祠祀焉

張恕徵鳳臺舉人任曲沃教諭父歿長號嘔血築廬墓
旁日上食如生自作記并十慕詠以見志

宋盛宋興德從兄弟鳳臺人康熙辛未歲祿千金市粟
以賑之全活甚衆

張弘烈鳳臺舉人用賓孫父歿依母且二十年母忽思改適泣諫不聽觸首大慟自縊而死

王璇鳳臺人好行其德嘗修太行山道自邑境至高平九十里行旅便之歲蝗蝻勗人掩捕視所得多寡給以錢人爭趨之是歲不為災其他設義學焚積券排難解紛邑人尤念其德

聖祖仁皇帝嘗書古稀人瑞四字以表賜焉

李志巖高平人性孝父客於外病歸延醫不愈比卒哀

毀踰禮至煩母宋切責及母死廬墓三年人稱其孝
又有高才能文章畢振基稱其長於用意趙介亦避
其鋒銳歿即誌之

張聯璧高平諸生事母楊甚孝母歿哀毀踰禮又多義
行周急卹貧慷慨從事

宋才高平人少孤事母孝嘗依姊夫張某灌園為生後
張老病孤苦才為生養死葬時稱其義

蘇天福高平人性慷慨嘗捐修太行東路百里會修文

廟助葺尊經閣並建兩廡庖福五十餘楹

李東高平人父昌文嘗憤貧困攜薄貲游廣南二十年
不返東少長日牽母衣問廣南所在母子時相對涕
泣及冠辭母將往尋會母病久之愈乃為弟婚娶俾
奉母自費父雅嗜物徒步走太行山遇盜以槌擊之
幾斃至漢口急附舟沈於水遇救免及抵佛山鎮四
訪無蹤一日夢見其父遂航海走瓊州府遇客言父
寓瓊嘗娶妾生女今歿已十三年妾亦適人矣乃求

妾所在問父墓出賣物哭奠極哀為女弟擇配乃負
父骸以北渡瓊海過雷江涉梅麓湖經觀音岬暨韓
瀧湘潭諸險凡往返萬八千里乃克歸父骸於祖墓
畢一棟高平人家貧事親克孝嘗走潞安負米不憚勞
日治田山中食必歸視飲食間不甘輒嘔感親故老
農然嗜人讀書輒令子振姬日夜雜誦曰能得爾王
父歡心吾雖勞無苦矣振姬後以積學聞

白鳳振陽城人鬻菜事父父年九十色養備至士大夫

羣加敬禮云

都勲陵川歲貢耿介孝友壬子間遷廟學剏齋房尊經閣費五百金而不專其名尤義舉云

曹延禧陵川拔貢官上高丞同兄剏建明倫堂出財五百金

張鈐字宇奇沁水人明尚書五典子也幼而端謹少長父偕兄忠烈胥宦遊祖母在堂克慊厥志弟銓銓銓幼父遽棄養以育以誨俾胥獲通籍父兩子廕胥推

以予忠烈子歲歉傾囊賑乏婁人子倚為司命葺縣
城障捍屹立後以子道湜封翰林院編修鳳臺陳文
正廷敬為傳

竇世英沁水諸生二歲而孤事孀母得其懽心母患胃
痛祈天求代哭泣廢食甫七日形僅骨立人幾不識
也母病卧牀十二年跣步不離比歿廬墓三年風雨
霑濡瀕死者數終制方歸

蒲州府

漢

籍少翁臨晉人任俠軹人郭解避罪置其母家室夏陽
身至臨晉臨晉籍少翁素不知解出解於關解傳太
原所過輒告主人處吏逐迹至少翁自殺口絕久之
乃得解

董永幼喪母家貧至孝傭力事父父卒就傭主貸萬錢
葬之一日道遇一婦人求為妻永與俱詣主人織絹
三百匹償其貸辭歸曰吾天之織女緣君至孝上帝

令助君償債言訖凌空去今上孝村有永墓碑文剝落

北魏

皇甫奴河東郡人為樂戶景明初河東郡楊風等七百五十人列稱樂戶皇甫奴兄弟雖沈屈兵伍而操尚彌高奉養繼親甚著恭孝之稱畿內大使王凝奏請標異詔從之

令狐仕猗氏縣人兄弟四人早喪父泣墓十載奉養其

母孝著鄉邑力田積粟博施不已景明初畿內大使
王凝請標異從之

薛善汾陰人魏孝武西遷改河東為秦州以善為別駕
族兄宗禮為刺史守蒲坂善言於兄曰高歡有逐君
之罪吾世荷國恩今大軍已臨而猶為高氏固守一
旦城陷函首長安署為逆賊死有餘愧盍及今歸款
崇禮猶豫善與族人斬關納魏師丞相泰進軍蒲坂
凡薛氏與謀者賜五等爵善固辭

北齊

樊衡性至孝喪父負土成墳植栢方數十畝朝夕號慕
子遜字孝謙舉秀才第一

北周

敬珍東魏高歡西伐珍謂其從祖兄祥曰高歡迫逐乘
輿天下忠義皆欲刺其腹今又稱兵西上吾可與兄
以兵斷歸路祥從之糾合鄉衆萬餘會歡敗歸帥衆
邀之斬獲甚衆丞相泰以珍為平陽太守祥為行臺

郎中

荆可河東猗氏人性質樸能苦身勤力供養其母甘旨無乏母喪水漿不入口三日絕而復蘇者數四葬後廬於墓側晝夜悲哭負土成墳蓬髮不櫛菜食飲水而已可墓去室十餘里獨宿其中哀感遠近邑里稱之大統中可鄉人上言周文令州縣表異之及服終猶若居喪大家宰晉公護聞其孝行特引見焉護亦克孝其母閻氏沒敵境每見可自傷久乖膝下而重

可至性可卒後收可妻子於京城恒給其衣食

隋

薛濬字道蹟汾陰人父琰周渭南太守濬少孤養母以孝聞幼好學有志行尋師長安何妥見而異之授以經業周天和中襲爵虞城侯歷納言上士新豐令開皇中歷尚書虞部考功侍郎上聞濬孝以其母老賜輿服几杖四時珍味當世榮之後母病濬貌甚憂悴親故弗之識母艱詔鴻臚監護喪事歸葬夏陽時極

寒濬衰經徒跣冒犯霜雪自京及鄉五百餘里足凍墮指創血流灘朝野傷痛州里賙助一無所受尋起令視事上見其毀瘠過甚為之改容顧羣臣曰吾見薛濬哀毀不覺悲感傷懷嗟異久之濬竟不勝喪病且卒其弟謨時為晉王府兵曹參軍事在揚州濬遺書於謨書成而絕有司以聞上為之屑涕降使齋冊書弔祭濬性清儉死日家無餘財濬子乾福武安郡司倉書佐

皇甫遐字永賢河東汾陰人累世寒微而鄉里稱其和
睦遐性純至少喪父事母以孝聞後遭母喪廬墓側
負土為墳復於墓南作一禪窟陰雨則穿窟晴霽則
營墓曉夕未嘗暫停積歲墳高數丈周迴五十餘步
禪窟成十有二室中間行道可容百人遐食粥枕土
形容憔悴營墓初有鴟烏各一徘徊悲鳴不離墓側
經月餘日乃去遠近聞其至孝競以米麵遺之遐受
而不食悉以營齋郡縣表上其狀詔旌異之

唐

董全素商州刺史溪弟孝慈友弟溪坐事棄同官令歸
溪歿比葬三年哭泣如始喪大臣高其行白為太子
舍人

薛齊寶鼎人右補闕內供奉膺之子河東郡公革之孫
佐興元李絳幕府絳遇害齊因死之

蒲州賈孝才虞鄉董敬直河東張金城呂神通呂雲呂
志挺呂元光趙舉張祐姚熾張師德馮巨源杜山藏

皆事親居喪著孝行李忠孝韓放陳涉張抱玉骨秀
英皆割股旌表門閭賜粟帛州縣存問復賦稅有授
以官者

五代

劉訓河中牙將梁遣張存敬攻節度使王珂珂計窮治
舟於河將歸京師訓夜入珂寢白事珂叱之曰兵欲
反耶訓解衣自索而入曰公苟懷疑請先斷臂珂曰
事亟矣計安出訓曰公若攜家夜濟人必爭舟一夫

鷓鴣張大事即去不若遲明以情諭軍中願從者猶得其半不然且為款狀以緩梁兵徐圖向背珂以為然乃登城呼存敬請聽命存敬退舍

宋

姚宗明河中永樂人十世祖棲雲當唐貞元中調卒戍邊栖雲父語其兄曰兄嗣未立可無往弟幸有子請代行遂戰沒塞上時栖雲方三歲母再嫁伯母養之既長事伯母如母伯母亡葬之又招魂葬其父廬於

墓次終身哀慕不衰縣令蘇輒以俸錢買地開阡刻石表之河中尹渾瑊上其事詔加優賜表其門名鄉曰孝悌社曰節義里曰敬愛栖雲生岳岳生君儒君儒生師正四世胥廬墓五世孫曰厚六世曰雅七世曰文八世曰敬真九世曰直十世曰宗明當慶歷初有司以姚氏十世同居聞於朝仁宗詔復其家十一世孫用和十二世孫士明十三世孫德自宗明至德又三世矣五十餘年而其家孝睦不替姚氏世為農

有田數十頃聚族百餘躬事農桑歷三百餘年無異
辭經唐末五代而子孫保守墳墓不相離散求之天
下未或有焉

薛繼先好學有高行少舉鄉試南渡隱居教授不接權
要事母以孝聞子純孝有父風俱以能詩有聲於時
金

龐整河中人父早喪事母孝及母卒合葬塋域整即日
屏妻子自入幽隧哀慕不翅生事其子源嘗入視整

偃仆救之方甦隧中忽發異香後整屣因不勝夜有人送藥服之愈人以為神勅賜旌表

申明膂力過人以傭直事母時盜賊夜劫殺人明一夕出母被殺假寐田畔夢母謂曰吾已死賊手矣賊東南行可追之明亟返會衆尾賊道渴明給衆曰至百里亭有井至則索賊不獲目眦俱裂遂仰天憤痛而死鄉人義之為立祠於丁莊村

麻秉彛以孝聞自幼敏悟能屬詩文皇統中進士歷官

兵部侍郎有能聲

南仲猗氏人有孝行以孝廉稱元兵至先士卒死之

元

梁威遜河中人至大間親喪廬墓兄諾海為鄂囉官自以嘗遠仕不得養其親棄職舉外僧代之人稱威遜能孝諾海能義

陳元凱克基孫膺之子性英毅有操行事父母以孝聞至元間太保劉文貞薦舉扈從累仕顯職積階諫議

浙東海右道肅政廉訪使追封潁川郡侯諡宣靖子
敬立舉明經官開成路治中

樊珪有孝行至大間為大都提舉母思泣喪明珪聞即
日解歸以舌舐母目七日復明有司以聞詔旌為孝
感之門

王庭祥七歲遭妹殤哭甚哀既瘞悲曰妹入土不可復
見他日父母歿庸可見乎於是事之益謹凡得鮮必
先奉二親每上食必親供八拜因事有缺歸記補之

如是者十七年父背膏病癰久不瘥庭祥以口吮膿而愈母目失明庭祥以舌舐復明事聞旌表其門

梁福幼習戎事精騎射渡江平宋有功授鄂囉官副統軍旅母周氏恙弗起謂福曰汝弟祥事吾孝吾歿後可以爾官讓之福敬諾及母卒同弟披髮跣足負土壘墳事聞旌其門

杜昭襁褓中失母繼母吳撫之甚厚及長事吳孝吳卒廬墓三年朝夕哭奠

張九霞字凌漢號知一蒲州人少負穎質沈重寡言笑
好丹鼎鉛汞之術後讀太極圖西銘正蒙等書遂潛
心正學家貧父適蜀圖生計九霞親操作奉母以養
祖母劉至傭書襄祖葬事一日其母曰汝父客蜀已
十五載存則扶掖而來否則輿櫬歸丘隴霞伏泣曰
向所以不欲遠覓者以母無依故也今婦能事母又
延一綫之續即當長往遂徒步以西繫貲不滿百錢
遇一宋姓者感其孝贈以金乃陟秦嶺穿子午道抵

瀘越滇南歷撒蒙中慶澂江大理諸路凡三易寒暑
跋涉五萬餘里不可得皇急籲天返瀘就旅次日將
晡一叟從外入雪髯丹顏向客語生平似蒲人熟聽
則其父也相向啼號觀者嗟訝迎以歸生平勉人為
善有橫逆相加者受之不報贖人已鬻之痴女及聞
鬻啞女者多其值買之恐他人之不遂其生也其天
性慈祥類如此

賈宗仁字體元號春江蒲州人壽登九袞有七人稱為

百歲翁週歲失怙孀母是依六歲受小學即解大意
塾師不能難既以家貧罷誦習遨遊江湖燕趙海岱
巴蜀間十餘年積千金旅次江州有趙某藏二十金
於篋忘之疑店婦索之亟其夫欲自殺翁隨出囊中
代償之後趙理篋而原金見驚愧殊甚淮徐道中偶
遇盜同行者悉匿於田而翁於途拾金一囊抵徐與
衆客分之曰共患難當共得失歸里後溫清定省曲
盡色養居母喪哀毀骨立服除以援例巡檢南頓弭

盜安民地方賴之以子芳貴贈戶部郎中

明

王旭字士熙性孝友精詩易叔鳳儀洪武間令盩屋論
戍旭代之行畧無怨色與御史謝琚學正曹月川相
友善著有鳴樵詩集

陸勝猗氏人宣德間輸賑三千石御史劉為立義民坊
湖潭臨晉人弟止母死同廬墓側朝夕拜奠終制不輟
時謂雙孝

王寵字君受萬泉諸生廬母墓朝夕哭奠如初喪時烏巢短桑抱卵不驚人以為孝感

王約倚氏人幼孤母牛遘風疾朝夕扶持躬親湯藥者二十餘年母卒苦塊廬墓常晝寢夢人呼曰起起水至矣俄水果至惟墓側禾無患正統二年旌門姪安子龍登科

喬通趙從政正統四年捐賑旌門又荆澍何東觀荆州傑荆邦余衛文俱以輸賑稱義

牛讓萬泉人景泰間輸穀賑饑

王珂滎河諸生力學能文甘淡泊好施濟東萊吳侯深

器之

溫錫永濟人成化間貢生性孝居喪哀毀廬墓致異應

事聞旌門

李子隆成化間捐賑旌門荆一書萬歷九年輸賑受義

官

樊九教臨晉人母疾顛天求代夢得神語割肉進之病

果愈

王榮蒲州人性孝貧死無棺者助葬之兄弟析居者勸止之呂太史表其墓

張輅蒲人正德間兄鑑觸劉瑾將坐重辟輅引罪請死太守義而釋之有牛伊耕妻溺殺三妾所生五子以妬聞一日妾賀有娠輅為畫計激妻逐妾藏輅家生子名張甦垂二十年教養娶妻妬婦亡始歸於牛

石景賢蒲州人幼孤事母鄭氏母病禱以身代誓不茹

輦病果愈母卒哀毀幾絕葬值靈雨祝天竟得霽其
塚不忍驟封負土日只三次廬墓三載州守陳某親
詣慰之

王天民蒲州人父朝客甘涼迎歸而歿號泣廬墓週兩
歲以哀毀卒

王旦字得元蒲州人孝友好義繼母逼入井出無怨言
撫弟彌篤輓舫者溺水漕盡覆出數百金易粟以道
其罪又嘗捐八百金助修郡城云

劉淮蒲州人性剛正里稱孝友壽至八十有三

孟程字大理蒲州人父浩兄琳家訓嚴程祇承甚篤鄉里推之累舉鄉飲賓不赴子孫多顯

王崇雅嘉靖乙酉解元仕至太僕襄毅兄也乙卯地震郡民死者十三四崇雅父同年進士鄒襄惠奉命齎金勘賑欲以丁絕地予之潛然對曰蒲民無辜橫罹慘傷雅邀天幸尚忍取非已物乎且絕丁多寄淺土骹骼不掩盍訪其婚友取貲以為葬資公仁及枯骨

矣鄒大嘆服

耿顯世猗氏人兄弟四人同居無間言隆慶中由恩貢
令合水澹泊如儒素俸悉分諸弟秩滿歸授徒力田
喬梓字子芳猗氏貢生萬曆間賑粥全活甚衆更給冬
衣者六七百人祀鄉賢

王光宙臨晉諸生為人個儻好施濟萬曆戊子大疫設
藥拯活者甚衆

陳志剛猗氏人自先代伍大益恭選至剛子淮七世同

龔釜容石餘今釜猶存

李鴻輿蒲州人週歲失怙事母孝母卒喪葬如禮讓產撫姪殯兄嫂代人償負有仁厚方正稱

孫鎮蒲州人兄弟同居友愛倍至客杭日有婦失夫金懼投江死解囊活之又嘗於涼州市藥以拯疫癘賑貧助葬多義行

楊選蒲州人好義拾還遺金三百兩散粟活貧掩骼卹困稱長者又劉榮亦嘗還金焉

陳江蒲州人父卒於外負櫬歸葬事母敬兄撫姪無間
言客池陽火或寄金忘其人訪而還之棄債還券人
多重其高義又韓瓚拾還遺金焚券託孤亦著義聲
王三鑑蒲州人商天津鄉人王某寄金百兩暴卒其子
不知也後二年鑑歸里還之封識宛然

李成芬蒲志載白屋高賢家屢空綵衣奉母祀鄉賢

謝竒齡蒲州人母病逾年衣不解帶居喪廬墓有黃雀

入壙之異

朱廷珪蒲州人世業農事親廬墓有孝聲

劉東旭蒲州人少受易能繼父業父歿廬墓沒後督學表其事與父忠甫曾祖母牛氏並建祠東關外

魏璣蒲州人事嫠母以孝聞為商得美味必遠致之或思母即竟日馳還禱疾得愈人謂孝感

趙釗蒲州人性孝友母劉病篤祈天求代病果愈兄痴弟瞽生養殯殮皆得體

洪尚仁蒲州人幼孤事母段色養惟篤母病號天求代

母卒年九十有六哀毀逾禮凡四遺姪五撫養成立
完娶分財羣高其義

李源發臨晉人事嫠母至孝撫弟成立人高其行祀鄉
賢

王銘臨晉人蒲志云正直有信義持是非鄉人服焉

賈蘭臨晉人輕財好義夜獲偷兒曰爾不足何不告我
竟以所竊物予之終身不言其名

李源澄臨晉人幼孤事母孝撫弟授室拓產分財鄉里

高其行舉賓飲

李奈猗氏人性至孝父彥和病篤思食肉家貧不能得
割左股作羹以進疾遂瘳時年四十尚無子後二年
舉子鑑鑑子如玉登鄉薦官鄜州牧又張朝紀亦嘗
割股焉

王守里人嘗乞借二千石年荒遂焚其券平時賑貧助
婚甚衆子明德明道有父風

王良卿字國忠猗氏人性孝友兄弟七人同居無間言

貢入太學兄以疑獄罹辟日夕焚香祝天隣舍生見而異之詢知為兄寃也後按山西白其事時謂誠感

曹孕祥字永興猗氏諸生篤孝友父痼病二十餘年扶侍不懈地震急呼父父自牕躍出瘡遂愈壽至九十人謂孝感居鄉亦有太丘風

喬岩號雲臺猗氏諸生嘗拾還遺金有盜夜竊其羸明日遇諸鬻所羸見主奔號衆議鳴官岩好言遣之後遇盜於途前盜固在曰喬公吾恩人不得輕犯護送

里餘而去

高舉萬泉人幼孤事母至孝每食必親供以貢入京思
母成疾卒

薛昆鉅鹿縣令雲霄子由歲貢令故城父喪廬墓哀毀
卒

杜麟萬泉諸生昭之姪也七歲母亡撫異弟甚厚父卒
廬墓三年官郟陽丞有廉聲祀鄉賢

成思忠滎河人世有潛德自高祖以來七世同爨庭無

間言稱義讓之門有碑存焉

聶邦憲榮河人父漢母郝其繼母樊生三弟嘗私取金三百以遺母家漢求不得幽之弗令食憲謀於弟曰舅家銀不能還將奈母何罄私囊二百八十兩呈父曰此前銀也母乃出邦憲後獨蓄衍人謂孝徵

楊佑萬泉諸生父斌邁疾同妻尉氏禱神求代疾尋愈荆可標字儀我猗氏人事嫠母以孝聞母病疫盛暑侍湯藥不解衣者四十餘日撫姪弘祚至成立祀鄉賢

令狐景雲字元慶性孝友精岐黃活人甚衆有報者則
曰吾非術士却弗受子廷瓚廷器以淳謹聞孫鏞亦
有孝行錕讓產焚券後世子孫多雋科第

謝廷輔臨晉人路拾遺金四百兩覆衣坐田中不得其
人歸置梁上明日再往則有乘騎奔號而來者邀與
歸具盤飧探物還之其人感泣曰我邵陽人王德為
主人營官事蒙全軀命願以半酬不許請白當事又
不許後五世孫陳常聯魁官翰林

荆世承猗氏諸生孝友好義崇禎十三年輸粟賑饑約至二千餘石

張四廕蒲州人崇禎間大饑出千金易粟賑之

李世振字起之棲鳳子授光祿寺署丞闖賊追餉火灸鐵烙備毒刑或謂何太自苦泣曰吾一身已登鬼錄忍復累及諸弟耶時壯其義

王寵韓太守僕也崇禎甲申闖賊渡河太守夫婦繼死寵視殮畢顧謂其妻楊妾薛曰吾儕雖人僕實明民

也豈臣妾賊乎遂製三木主書姓氏至夜半懸三繯
妻妾先經死寵乃縊

國朝

陳毓秀字含甫猗氏人父國泰諸生以孝友稱秀善事
繼母荒歲施金粟全活無算不給則以牛羊田地濟
之由歲貢任平遠訓導子基命帶經力田叔姪兄弟
三世同居無間言自國泰至基命俱有孝行祀鄉賢
孫綸綽皆成進士

李斗星字拱北永濟縣人有至性總角日依父母側不
少去就外傳讀內則曲禮諸書定省溫清不敢少懈
然家故貧不能數具甘脆嘗自傷為子無狀而父母
雅安之泣下既補諸生生徒乃稍稍進始克資以養
而教授生徒亦必以孝弟為先游其門者咸飭門內
行焉後父母歿廬於墓先後凡六年

陳所思臨晉人家貧鬻炭晚於路左拾騾一頭並載金
帛即持火覓得其主則蒲州樊城也時沈醉卧地負

歸待醒盡還所有堅不受謝明年荒向樊借穀百二十石分賑多人孟軍門勦賊時有諸生姚啟英冠英被執誣陷將就戮思仗義公言至受刑不變軍門嘉焉為釋二生而坐誣者

張志奇猗氏人順治己丑姜瓖之變父東升母潘久病卧牀伯東泉伯母史亦老難行志奇以次背負出城輓車避焉後繼逝終歲傭工力舉四喪人多義之

衛大訓臨晉縣人父有五子常嘆曰子多母饑信然哉

大訓聞之感泣侍養食必具酒肉父卒事母出必告
反必面母愛諸孫嘗分甘旨徧給之大訓誡諸子姪
令固辭母嘗語鄰媪吾諸孫皆喜食糠覈吾殊不解
撫弟妹婚嫁胥如禮妹于歸歲荒迎養於其家遠近
胥稱孝子

劉養德臨晉縣人家貧為人傭而奉母甘旨不少缺人
胥稱其孝後歲凶躬負母走豫道遇賊揮刀及其母
養德以身護母曰寧殺我無殺我母賊以刀指養德

母曰子死我奚能獨生幸憐之賊不聽舉刀刀條折
為二乃相顧錯愕曰此孝子也殺之天且不我佑遂委
之去養德母子獲全

衛既翕猗氏歲貢康熙乙卯間倡製文廟祭器三百具
卒未稔輸賑數百石濟親友又數百石不繼則傾貲
二十餘金三日立盡全活甚衆

劉煥臨晉人家貧未娶執爨以養瞽母出告反面風雨
如期必歸母老病負之而行垂三十餘年

韓啟芳臨晉人性至孝鬻子葬父終三年不入內室母
病危禱於扁鵲祠長跪七晝夜血流濺地夢神賜藥
而愈比歿廬墓三年嘗冒雪夜有狼導之近塋遂沒
塋中生有異草高至八尺餘春花冬萎至芳終制乃
已

邵國昇倚氏人慷慨好義時地糧多累里甲聚訟數年
不決昇捐金募民開墾荒蕪復請於縣令陳素抱免
稅二年鑿井築垣創立陳建莊又舊以富民充倉吏

里胥開報多破產求脫縣令高向極議闔邑倩一名
至今稱便昇實為之倡云

王國正猗氏縣人幼喪父家貧甚不能娶妻子身奉母
明季盜起負母避山谷遇掠盜礪刃將殺其母國正
呼曰寧殺吾勿傷吾母不然吾母子偕死耳涕泗洑
瀾悲不自勝盜胥釋之并告避兵地母歿廬墓三年
直指吳題旌孝子

陸紹祖猗氏諸生性孝友父喪哀毀盡禮廬墓側朝夕

號慕母喪亦如之兄弟析產讓肥取瘠子運際運禧
共登進士自處猶同寒士云

賈允重萬泉縣人邑弟子員性篤孝母早歿父娶後妻
待允重不以禮允重不敢少忤雖虐使亦不敢少憚
勞間為人言母愛允重甚允重不能事母奈何泣下
久之後母亦感泣門內無間言父繼母歿廬墓側三
年未嘗見齒康熙十七年建坊旌焉

張朝紀猗氏人年十八母病垂危夢神語曰臂肉可愈

也如夢行之病遂瘳

令狐永觀猗氏進士性孝友客京邸聞父病旬日馳歸
勞瘁不支親侍湯藥父卒哀毀骨立旋遭母喪勉襄
葬事而歿永觀器量寬厚僕嘗遺失幣物數十金慰
而遣之家居見盜蔬禾者亦亟避去惟恐其抱慚云
杜忠猗氏人椎魯有至性嘗因父病往禱解州關帝廟
膝行泥淖中往返百里一步一稽顙露宿塗中歷五
年不少懈又嘗為母禱叢祠冒雪膝行至則廟門自開

人咸異之

趙廷蓋榮河廩生甘貧力學有介操事癱兄五十年如

一日

孫希昇榮河人幼孤事孀母至孝歲歎採菜以供色養
弗倦母卒廬墓三年其他還金掩骼亦多義行

潘衍渭榮河諸生父亡事繼母繼祖母以孝聞族叔某
幼孤迎其母子同居教養婚配惟謹母與祖母對人
言未嘗不稱其孝云

孫天慶滎河人年十七割股愈母疾邑令表其名於旌善亭

潘源湛滎河諸生事親色養備至父疾一晝夜行三百里求醫治之父有養子目雙瞽待之無惰容

薛英賢永濟縣人鬻菸於市夜輒苦讀父瘼疾日減食積錢醫治雍正五年旌表

崔效林永濟縣人雍正七年有同邑高世澤者路遺金珠等物甚厚拾而還之世澤願酬以半效林不納鄉

人義之聞諸朝

恩給八品服復加賞賚示獎勵焉



山西通志卷一百四十三